

Schibettas 2021

Corona ha fatg il streh atras tut las occasiuns culturalas sco concerts da musicas e chors, giubileums da societads e presentaziuns da teater. Aschia crodan era ils usits tradiziunals sco Chalandamarz ed il trer schibettas a Danis-Tavanasa, Dardin e Vaz-sut. La fotografia dils onns 1937 muossa ils scolars da Danis-Tavanasa sil Plaun da Schibas, sin Chistatscha sur il vitg da Danis. Igl usit ha adina liug l'emprema sonda da cureisma.

La sera usitada ch'entscheiva cun ina devoziun en baselgia, organisada d'ina gruppa da giuventetgna, carmala mintg'onn in grond pievel. En tenda dall'ustria «Schibetta», organisada dalla societad da musica, s'entaupa la raspada festiva. Avon la tenda san ins contemplar las schibettas glischontas che sgolan tras l'aria suandadas cul clom dedicau alla conscolara ni amitga. «Oh.. tgei biala schibetta per la...» Hosps e biars anteriurs vischins selegnan dalla sentupada e laian reviver las bialas regurdientschas dils onns da scola e giuventetgna. Uonn dat ei denton negina fabricaziun da schibettas en scola, negina devoziun, negina sentupada, negin fiug e negin clom. Tut met! Ed il plascher da guder ina legra sera da libertad pils buobs e per la giuventetgna croda ell'aua. La sentupada maunca!

Ciril Friberg



Igl onn 1937 sur il vitg da Danis.

FOTO MAD



Trer schibettas ils 14 da fevrer 2016 a Dardin.

FOTO AUGUSTIN